



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

26. Kalenderwoche – ab 27. Juni 2010

Engl sin männlich

Als wie wo mir noch jung un vorliebd gewähsn sin, isch un meine Gudste, da hab isch manschma zu meiner Gudstn - mei Engl! - gesachd. "Engl" is ja e sähr beliebtor Gosenahme fiehr jemand, dähn mor gerne ham dud. Un ooch meine Gudste had damals zu mir manschma - mei Engl! - gesachd. Isch weeiß jedzde ooch nisch mähr genau, warum un wesvorweschn se sich zu solsche neddn Worde had hinreißen lassn... - abor isch heers heide noch im innoren Ohr - mei Engl!

Nu hadse das beschdimmd nisch gesachd, weil isch e ziehmlichor Vochl gewähsn bin... un e bißl fladdorhafd war... ma jedzde abgesähn dadervon, dass Vöschl ooch rumvö... äh... rumflieschn dun... nee, se had das beschdimmd gesachd, wo isch ihr irschendwas geschenkd hab odor irschendwas Gudes gedahn hab... zum Beischbiel... nee, isch weeißes werglisch nisch mähr!

Un isch hab Engl zu meiner Gudstn gesachd, weil se ehm off misch offgebassd had, sisich um misch gesorschd had... un ooch wenn mir ma dor Kobb gebrummd had, weschn vorahmdlischn Alkoholgenusses... nee, da hadse mir Wassor un eene Kobbschmärzdabledde gebrachd! Werglisch! Dass se mir die Dabledde mid eenor kurzsn Bedienungsanleitung iborgähm had... - in Wassor offleesn! Selbor schuld! Suffkobb! - ...naja, das is ja bloß e bißl Ärschor gewähsn. Se had sisich dazumals immor geärschord, wenn isch ahmds mid meine Golleeschn noch off e Bier un off een Schgad irschendwo eingeriggd bin. Un wensch dann manschma hab de Englein sing heern... - im Bedde - da warse ehm e bißl vorärschord. Mei Engl!

In de ledzdn zwanzisch Jahre is das Word "Engl" allordings bei mir un meiner Gudstn nisch mähr in Gebrauch gewähsn. Jednfalls nisch im geeschneidischn. Un es däde ja ooch nisch mähr bassn.

Ooch wenn isch jedzde Flieschl ham däde - isch bin werglisch kee Engl mähr, heeschdens e Jumbo-Dsched! Un meine Gudste dud immor mähr in Rischdung Hausdrache dendiern.

Nee, das Englsein is nisch bloß von de Flieschl abhängisch! Mid Flieschl gibbds werglisch sähr viele Wähns, die keene Engl sinn! Alleene solsche lädischn Vieschor wie de Miggnd odor de Flieschn... odor dann de Fledormeise, die unnor Naduhrschudz schdehn dun!

Ach, kenn Sie das, wo eene Maus mid ihm Mausekind im Wald schbaziern gehn dud un da kommd eene Fledormaus? Kenn Se nisch! Da sachd das Mausekind: Gugg ma, Mama, ein Engl!

Ja, Fledermeise sin sozusachn Meiseengl! Dor Begasus is e Bfärdeengl! De Audos sin ooch Engl - se ham Kohdflieschl!

Nee, Schbaß beiseide - jednfalls is de Engelei e sähr indressandes Gebied. Ma ganz abgesähn von dähr Frache, ob Engländor ooch Engl sin, bloß weil se englisch redn dun?

Un sähr bezeischnend is eischendlich ooch, dass Engl uhrschbringlich männlich sin. Es heeßd - der Engl! Das Word "Engelinnen" duds nisch gähm! Bloß ma so... so als kleenor Hinweis... ganz werdfrei... was dähn Uhrschrung dor Engl bedreffn dud!

Eduard Sachsenmeyer